



Ehemaligenverein Schulheim
Schloss Erlach 3235 Erlach

JAHRESBRICHT vom Presi 2023 / 2024

„Viellech isches wichtig...., viellech ja o nid...., ds Läbe isch e Pouse....!“

Usem Christoph Trummer sym Labor, 16. Februar 2018.

Am 25. März 2023, ar HV hei 20 Vereinsmitglieder teilgno. Ä markante Bschluss vor HV isch d' Erhöchig vo üsem Mitgliederbytrag vo 20.- uf 30.- Franke gsy! Mir wärde eventuell ir Zuekunft üse jährlech Bytrag i Freizytfonds vom SHE chönne erhöche.

Äs tiefs Düreschnuufe isch dür d'HV, wo dr Urs Anliker vor Abstimmig vom Grosse Rat brichtet het: Äs isch um d' Versäubständigung vo de kantonale Schue- u Jugendheim gange! Dr Gross Rat vom Kanton Bärn isch gar nid uf d'Motion u d'Abstimmig ygange!

Dr Urs het üs ou no verzeut, dasses i de Heim ä nöii Software git, wo no i de Chinderschue steckt u dür das immer wyder Problem erzügi.

Grossi Sorge git ou di auugemeini Tüürig vom Kanton u het drum ou ds intensive Spare im Heim verursacht. Natürlech hei ds Heim ou d'Corona-Regle beschäftigt!

Am 15. Juni 2023, het üsi 38. Vorstandssitzig stattgfunge. Us myre Sicht si di wichtigschte Traktande gsy: Ds Jubiläumsfescht „150 Jahr SHE“ vom 28. Juni 2024! Mir hei im Vorstang gredt, wär vo üs im OK vom Jubiläumsfescht wird mithäufe. Mir hei ou über d'SHE-Websyte diskutiert u zämetreit, was mir virtuell wei zeige: Vereins-Gründigsgschicht, Statute, Chronik, Jahresbrycht, HV-Protokoll.

Am 13. Ougschte 2023, het üses Seemätteli-Träffe stattgfunge. Äs isch äs „Freis Träffe“ gsy, d.h. äs Zämecho ufem Seemätteli, wo jedi ihres/jede sys Ässe u Trinke säuber mitnimmt. Äs hei no nid aui Vereinsmitglieder realisiert, dass me am „Freie Seemätteliträffe“ sys Ässe u d'Trinke muess säuber mitnäh! Ds Zämesitze bym Blockhus isch wie immer gmüetlech, zfriede u luschtig gsy.

Am 09. Dezämber 2023, hei mer üsi 39. Vorstangssitzig abghaute. Wäsentlech u spannend isch ds Traktandum vom Jubiläumsfescht „150 Jahr SHE“: Üse Verein hiuft, wie scho erwähnt, byr Ustellig „Vor Rettigsanstalt zum Schueuheim Schloss Erlach“ mit u wird ä Stand bym Feschtzäut betriebe, z.B. wärde mer de ou d' Biographie vom Willy Brauen uflege u verchoufe. Einisch meh isch üses Jahresabschlussässe i de „Drü Fische“ z'Lüscherz sehr fein gsy u für üs aui ä „dankbare Lohn“!

Am 09. März 2024 wird üsi 40. Vorstandssitzig düregführt. Mi säuber het bsungers ds Traktandum vom Jubiläumsfescht „gfesslet“. I bi froh, dass mir d'Marianne, wo üs nöi im Vorstang ungerstützt, mir so tatchräftig im OK u bym Ustelligsufbou ghuufe het, da ig i däm Jahr wäge myne Härzoperatione u REHA's ab u zue usgfau bi.

Äs het üs Spass gmacht byr Ustellig u mit de Museums slüt vom Schloss Erlach zschafe u zwürke! Mir hei viu oranisatoreschi Useforderige zmeischtere gha, z.B. ou no Ustelligsbetröig vom Juli bis Septämber 2024 zbetrie! D'Vernissage isch am 21. Juni 2024 vorgseh gsy, ds Jubiläumsfescht am 28. Juni 2024. Was mer ou no müesse mache, isch wäge de kantonale Dateschutzregle: Jedes Vereinsmitglied muess äs Papier/Verybarig ungerschrybe, dass är oder si yverstange si, dass Föteli vo ihm oder ihre z.B. uf der SHE-Websyte oder i Jahresbrichte veröffentlech wärde.

Am 21. Juni 2024 isch d'Vernissage vo üsere Jubiläumsfescht-Ustellig gsy u am 28. Juni 2024 ds Jubiläumsfescht. Mir hei a beidne Aläss viu Glück mitem Wätter gha u viu Gescht erlält, wo sech für d'Vernissage vor Ustellig u natürlech für ds Jubiläumsfescht sehr interessiert, begeischeret u gfröit hei!

Ydrücklech isches gsy mit Ehemalige Schlossgiele oder ou mit ehemalige Arbeitskolleginne u Arbeitskollege dür d'Usstellig zloufe. Gly si vo de Föteli, Gägeständ, Örtlechkeite, Texte u Interviews by dene Bsuecher egeti Biuder, Gschichte und Erläbnis ufecho. U de isch ds Verzeue losgange! Für mi persönelch isches spannend gsy vo ehemalige Schlossgiele berührendi Texte, Biuder u Ussage us de Vierzger, Fünfzger-, Sächszger- u Siebezger-Jahr für d'Ustellig zübercho, z'notiere u uszsteue. DANKE Peter M., Urs K., Willy B., Markus M. un am ene Unbekannte für d'Bereitschaft mitzhäufe u di berührende Ussage!

I danke ou am Historiker Emanuel Tardent für syni Text u gschichtliche Zämfassige vor letschte Jubiläumsusstellig 1999, wo mir wyder hei chönne bruuche u ysetze! Am Museumsverein Erlach danke ig für üsi Zämarbeit für d'Usstellig!

Am 14. Ougschte 2024 het ds Seemätteliträffe by schönschem u heissem Wätter stattfunge. I säuber ha a däm Träffe nid chönne teilnäh! Wie vorgseh hei üsi Lüüt ds Apéro im Schlossgarte düregfuehrt, aber vorhär hei d'Gescht, wo Interässe hei gha, no d'Jubiläumsusstellig „Vor Rettigsastaut zum Schueheim Schloss Erlach“ ir Mediathek un im Schlosseschtrig Nord, reschpektiv im Turm unger dr Fuehrig vor Ursula u Marianne chönne ga aluege. Ehemalegi, wo dür d'Usstellig gloffe si, hei ähnelchi Ydrück u Emotione gah, wie scho obe beschrybe! Ds Träffe ufem Seemätteli syg gmüetlech, schön u erfougrych gsy, aber d'Hitz het zschafe gmacht. Ä bsungere Dank giut a üsem Fleischsponsor u Grillmeischer Rico, üsem Vorstang u viune HäuferInne, z.B. dr Ursula, am Yüksel u José!

Am 14. Dezämber 2024, 41. Vorstandssitzig. Mir chömme wie immer ir Schloss-Veranda zäme u tüe üs yfrig ustuusche, informiere, diskutiere u entscheide. **Dr Abschluss vor Jubiläumsusstellig, d'Finissage am 17. Novämber 2024) u ds Vertoue vom Jubiläumsfescht** bruucht si Zyt u unbedingt ä Dankesrundi: **Merci viu Mau aune Häuferinne u Häufer für ihres Engagement,** bym Organisiere, am Stang u byr Ufsicht vor Ustellig: DANKE Marianne, Ursula, Roland, Yuksel, Willy, Peter, Markus u Urs K.! Mir präppä am 14. Dez. ou no d'HV vom 08. März 2025. I danke no einisch am SHE, am Urs Anliker, wo di meischte nid verchoufte Buecher „Us dr Dunkuheit i Schatte“ vom Willy Brauen üs abkouft het u sytem Januar 2025 jitze via Sekretariat ds Buech zum Verchouf abietet u übernimmt! Üses Abschlussässe isch wie immer (lue 09.12.23) fasch göttlech gsy!

Am 08. März 2025, ar 12. Houptversammlig vom Ehemaligeverein. I wünsche am Verein aues Guete u hoffe, dass sech no Lüt mäude für i Vorstang! Wär übernimmt ab jitze d'Kasse u Präsiämtli? I möcht ou am SHS Erlach, verträte düre Urs Anliker, no einisch härzlech für d'Ungerstützig u sys unermüdleche Engagement danke!